



06. Maj 2019

UPA 2019/178
Aqqalu C.Jerimiassen

Najukkami sukkulinnik soorlu sikunik kaaginillu tunisassioartartut unammillersinnaassusaat qaffassarniarlugu sukkunut akitsuutunik utertitsisarnermut aaqquissuussinerup atuuteqqilernissaa eqquteqqullugu Naalakkersuisut peqquneqarnissaannik Inatsisartut aalajangiiffigisassaattut siunnersuut. Utertitsisarnermut aaqquissuussineq eqquteqqinneqassaaq ulloq 1. januaari 2020 aallarnerfigalugu.

(Inatsisartunut ilaasortaq Justus Hansen, Demokraatit)

Peqqinneq, aalaneq timersortarlunilu inuuneq Demokraatit siunnerfiginiarlugit piffissaq kingulleq nipilioqaat. Uanilu siunnersuutigineqartoq atuarlugu aallartikkaanni niaqoq kuminngittoornangilaq taama anguniakkaminniik imminut assortortigisumik takoreerluni.

Taamaattumik siunnersuuteqartoq assorsuaq aperilaarusunnarpoq sooq taama imminut assortortigisumik saqqummiussaqaarsinnaanersoq.

Ilami “realpolitik” eqqartortuarparsi, tassa kusassagaangitsumik politikki, neriunnermillu toqqammavilimmik aningaasalersuinnginnissaq ersaringaartumik oqaatiginikuuullusiuk, assersuutitullu taalaaaraanni aningaasanut inatsimmi konto 64.10.25, 48mio. koruuninik imalik nunatsinni uuliaqarneranik nunatta avammut siuarsaaviginissaanut siunertalik akueriumangilarsi timersornermullu annertunerpaartai aningaasat atorineqartariaqarneri siunniullugit. Illuani taamaammat utertikkusunnartaqaaq oqassallu, tungujortuunersi eqqartulinnguarlugu inuussutissarsiut nunatsinni anginerpaamut inissisinnaasoq piviusorsiorsorinngilarsi. Taamaattoq maanna sioraasanut tungusunnitsunullu utertitsisarnerup atuutsileqqinneqarnissaa timersorneq aalanerunerlu piniannguasaarlugit taamatut siunnersuuteqarpusi, imatut taava paasisariaassanerluni; neriutigiinnarissi sukkulinnik nioqquteqartuusut nioqqutaat akikilligaluarunik timersortartunik suli pisiarineqarnerulernaviangitsut, imaluunnit innuttaasut pualanerulernaviangitsut neriutigisimanerpaat.

Inuussutissarsiuteqartut annertuumik sukkulinnik nioqqutissiorniartut ilumoorpoq annertumik malugisimassagaat utertitsisarneq atorunnaarsinneqarmat, takorloorneqareersinnaavormi tamanna uagutsinnit atuisuniik taamaallaannaasit kingumut akilerneqarsimassasoq. Eqqaamasinnaaqaaralumi Nuuk Imeq A/S-imit saftinik nioqquteqartarallarmata mamaqisunik, nutaarsiassatigullu tusarlugu ajunaarutaannaasumik ingerlasimalernera pillugu akitsuutit annertuallaarnerilu ilaatigut toqqammavigalugit tunisassioartartut unitsiinnartariaqarsimagaat.

Kaagit assigisaallu nunatsinni arlalitsigut piariikkatut suliat qerisutut tikinnikut Qallunaat nunaannersuut sineriassuatsinni takukkajuppagut, tassami nunaqarfippassuarni Pilersuisumit ingerlanneqartuni bake-off-inik taaneqartartut atorineqakkajuppuput, aammalumi illoqarfinni annerni allaat taamaalluni. Immaqami toqqaannaq oqarluannaraanni Pisiffik taavalu Kalaallit Nunaanni Brugseni nammineq iffiukkaminnik annerusumik nunatsinni tunisassioartuupput, namminersortumininnguit sinerissatsinniittut eqqarsaatigissagaanni qangaaniilli ingerlareersut.



Una siunnersuut taama isikkoqartillugu akuerineqassappat siunnersuuteqartut “realpolitikkertarnertillu” ingerlatiinnarniarpassuk Atassummiik isumaqarpugut meerartagut annerusumik Karius aamma Baktus pillugit oqaluttuuttarneri annertusangaatsiartariaqassasoq, tassami sodavandit kaagillu iffiukkat hanekam spandauerillu sukkuinnangajaat akikinnerulerpata aningaasaminaarsuutinnguaminnik kaasarfimmiuminnik pisiniarsarinerulersinnaanerannik pinaversaartinnerulaartariaqassagatsigit. Ilanngullugittaarmi eqqarsaatigisariaqassuagut atuartorpassuit ullup qeqqaraangamik peqqinnanngitsunut saappallaannginnissaat.

Taamaattoq una siunnersuut Atassummiik ataatsimiitsitaliami susassaqtumi misissorluagassanngorlugu innersuukkusupparput.